



1004
9
12

遼史

卷一百五之
卷一百一十六

卷一百五之五十六
 卷一百五之五十七
 卷一百五之五十八
 卷一百五之五十九
 卷一百五之六十
 卷一百五之六十一
 卷一百五之六十二
 卷一百五之六十三
 卷一百五之六十四
 卷一百五之六十五
 卷一百五之六十六
 卷一百五之六十七
 卷一百五之六十八
 卷一百五之六十九
 卷一百五之七十
 卷一百五之七十一
 卷一百五之七十二
 卷一百五之七十三
 卷一百五之七十四
 卷一百五之七十五
 卷一百五之七十六
 卷一百五之七十七
 卷一百五之七十八
 卷一百五之七十九
 卷一百五之八十
 卷一百五之八十一
 卷一百五之八十二
 卷一百五之八十三
 卷一百五之八十四
 卷一百五之八十五
 卷一百五之八十六
 卷一百五之八十七
 卷一百五之八十八
 卷一百五之八十九
 卷一百五之九十
 卷一百五之九十一
 卷一百五之九十二
 卷一百五之九十三
 卷一百五之九十四
 卷一百五之九十五
 卷一百五之九十六
 卷一百五之九十七
 卷一百五之九十八
 卷一百五之九十九
 卷一百五之一百





遼史卷一百五

列傳第三十五

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

能吏

漢以璽書賜二千石唐疏刺史縣令于屏以示獎率故
二史有循吏良吏之傳遼自太祖創業太宗撫有燕薊
任賢使能之道亦略備矣然惟朝廷參置國官吏州縣
者多遵唐制歷世既久選舉益嚴時又分遣重臣巡行

境內察賢否而進退之是以治民理財決獄弭盜各有其人考其德政雖未足以與諸循良之列抑亦可謂能吏矣作能吏傳

大公鼎渤海人先世籍遼陽率賓縣統和間徙遼東豪右以實中京因家于大定曾祖忠禮賓使父信興中主簿公鼎幼莊愿長而好學咸雍十年登進士第調瀋州觀察判官時遼東雨水傷稼北樞密院大發瀕河丁壯以完隄防有司承命峻急公鼎獨曰邊障甫寧大興役事非利國便農之道乃疏奏其事朝廷從之罷役水亦不爲災瀕河千里人莫不悅改良鄉令省徭役務農桑

建孔子廟學部民服化累遷興國軍節度副使時有隸鷹坊者以羅畢爲名擾害田里歲久民不堪公鼎言于上卽命禁戢會公鼎造朝大臣諭上嘉納之意公鼎曰一郡獲安誠爲大幸他郡如此者衆願均其賜于天下從之徙長春州錢帛都提點車駕如春水貴主例爲假貸公鼎曰豈可輟官用徇人情拒之頗聞怨詈語曰此吾職不敢廢也俄拜大理卿多所平反天祚卽位歷長寧軍節度使南京副留守改東京戶部使時盜殺留守蕭保先始利其財因而倡亂民亦互生猜忌家自爲鬪公鼎單騎行郡陳以禍福衆皆投兵而拜曰是不欺我

敢弗聽命安輯如故拜中京留守賜貞亮功臣乘傳赴
官時盜賊充斥有遇公鼎于路者卽叩馬乞自新公鼎
給以符約俾還業聞者接踵而至不旬日境內清肅天
祚聞之加賜保節功臣時人心反側公鼎慮生變請布
恩惠以安之爲之肆赦公鼎累表乞歸不許會奴賊張
撒八率無賴嘯聚公鼎欲擊而勢有不能嘆曰吾欲謝
事久矣爲世故所牽不幸至此豈命也夫因憂憤成疾
保大元年卒年七十九子昌齡左承制昌嗣洺州刺史
昌朝鎮寧軍節度

蕭文字國華外戚之賢者也父直善安州防禦使文篤

志力學喜愠不形大康初掌秦越國王中丞司事以才
幹稱尋知北面帖黃王邦彥子爭蔭數歲不能定有司
以聞上命文詰之立決車駕將還宮承詔閱習儀衛雖
執事林林指顧如一遷同知奉國軍節度使歷國舅都
監壽隆未知易州兼西南面安撫使高陽土沃民富吏
其邑者每黷于貨民甚苦之文始至悉去舊弊務農桑
崇禮教民皆化之時大旱百姓憂甚文禱之輒雨屬縣
又蝗議捕除之文曰蝗天災捕之何益但反躬自責蝗
盡飛去遺者亦不食苗散在草莽爲烏鵲所食會靈雨
不止文復隨禱而霽是歲大熟朝廷以文可大用遷唐

古部節度使高陽勒石頌之後不知所終

馬人望字儼叔高祖胤卿爲石晉青州刺史太祖兵至堅守不降城破被執太祖義而釋之徙其族于豎巫閭山因家焉曾祖廷煦南京留守祖淵中京副留守父詮中京文思使人望穎悟幼孤長以才學稱咸雍中第進士爲松山縣令歲運澤州官炭獨役松山人望請于中京留守蕭吐渾均役他邑吐渾怒下吏繫幾百日復引詰之人望不屈蕭喜曰君爲民如此後必大用以事聞于朝悉從所請徙知涿州新城縣縣與宋接境驛道所從出人望治不擾吏民畏愛近臣有聘宋還者帝問以

外事多薦之擢中京度支司鹽鐵判官轉南京三司度支判官公私兼裕遷警巡使京城獄訟填委人望處決無一寃者會檢括戶口未兩旬而畢同知留守蕭保先怪而問之人望曰民產若括之無遺他日必長厚歛之弊大率十得六七足矣保先謝曰公慮遠吾不及也先是樞密使乙辛竊弄威柄卒害太子及天祚嗣位將報父仇選人望與蕭報恩究其事人望平心以處所活甚衆改上京副留守會劇賊趙鍾哥犯闕劫官女御物人望率衆捕之右臂中矢炷以艾力疾馳逐賊棄所掠而遁人望令關津譏察行旅悉獲其盜尋擢樞密都承旨

宰相耶律儼惡人望與已異遷南京諸宮提轄制置歲中爲保靜軍節度使有二吏兇暴民畏如虎人望假以辭色陰令發其事黜配之是歲諸處饑乏惟人望所治粒食不闕路不鳴杼遂授彰義軍節度使遷中京度支使始至府廩皆空視事半歲積粟十五萬斛錢二十萬緡徙左散騎常侍累遷樞密直學士未幾拜參知政事判南京三司使事時錢粟出納之弊惟燕爲甚人望以縑帛爲通曆凡庫物出入皆使別籍名曰臨庫姦人黜吏莫得軒輊乃以年老楊言道路朝論不察改南院宣徽使以示優老踰年天祚手書宣馬宣徽四字詔之旣

至諭曰以卿爲老誤聽也遂拜南院樞密使人不敢干以私用人必公議所當與者如曹勇義虞仲文嘗爲姦人所擠人望推薦皆爲名臣當時民所甚患者驛遞馬牛旗鼓鄉正廳隸倉司之役至破產不能給人望使民出錢官自募役時以爲便久之請老以守司徒兼侍中致仕卒諡曰文獻人望有操守喜怒不形未嘗附麗求進初除執政家人賀之人望愀然曰得勿喜失勿憂抗之甚高擠之必酷其畏慎如此

耶律鐸魯幹字乙辛隱季父房之後廉約重義重熙末給事誥院咸雍中累遷同知南京留守事被召以部民

通身卷一百五 死德 五
懇留乃賜詔褒獎大康初改西南面招討使爲北面林
牙遷左夷離畢大安五年拜南府宰相壽隆初致仕卒
鐸魯幹所至有聲吏民畏愛及退居鄉里子普古爲烏
古部節度使遣人來迎旣至見積委甚富謂普古曰辭
親入仕當以裕國安民爲事枉道欺君以苟貨利非吾
志也命駕而歸普古後爲盜所殺

楊遵勗字益誠涿州范陽人重熙十九年登進士第調
儒州軍事判官累遷樞密院副承旨咸雍三年爲宋國
賀正使還遷都承旨天下之事叢于樞府簿書填委遵
勗一目五行俱下剖決如流敷奏詳敏上嘉之奉詔徵

戶部逋錢得四十餘萬緡拜樞密直學士改樞密副使
太康初參知政事徙知樞密院事兼門下侍郎平章事
拜南府宰相耶律乙辛誣皇太子詔遵勗與燕哥案其
事遵勗不敢正言時議短之尋拜北府宰相大安中暴
卒年五十六贈守司空諡康懿子晦終昭文館直學士
王棠涿州新城人博古善屬文重熙十五年擢進士鄉
貢禮部廷試對皆第一累遷上京鹽鐵使或誣以賄無
狀釋之遷東京戶部使大康二年遼東饑民多死請振
恤從之三年入爲樞密副使拜南府宰相大安末卒棠
練達朝政臨事不怠在政府修明法度有聲

論曰孟子謂民爲貴社稷次之司牧者當如何以盡心
公鼎奏罷完隄役以息民拒公主假貸以守法單騎行
郡化盜爲良庶幾召杜之美文知易州雨暘應禱蝗不
爲災人望爲民不避囚繫判度支公私兼裕亦卓乎未
易及已鐸魯幹吏畏民愛楊遵勗決事如流真能吏哉

遼史卷一百五終

遼史卷一百六

列傳第三十六

元開府儀同三司上柱國前中書右丞相兼修國史都總裁脫脫修

皇明奉訓大夫右春坊右諭德兼翰林院侍講署國子監事臣沈淮等

奉

勅重校刊

卓行

遼之共國任事耶律蕭二族而已二族之中有退然自
足不淫於富貴不詘於聲利可以振頽風激薄俗亦足
嘉尚者得三人焉作卓行傳

蕭札刺字虛輦北府宰相排押之弟性介特不事生業

保寧間以戚屬進累遷寧遠軍節度使秩蒲里居淡泊自適統和未召爲南京馬步軍都指揮使以疾求退不聽遷夷離畢又以疾辭許之遂入頡山杜門不出上嘉其志不復徵札刺自是家于頡山親友或過之終日言不及世務凡宴游相邀亦不拒一歲山居過半與世俗不偶耶律資忠重之目曰頡山老人卒

耶律官奴字奚隱林牙幹魯之孫沉厚多學詳於本朝世系嗜酒好佚初徵爲宿直將軍重熙九年以疾去官上以官奴屬尊欲成其志乃許自擇一路節度使官奴辭曰臣愚鈍不任官使加歸義軍節度使輒請致政官

奴與歐里部人蕭哇友善哇謂官奴曰仕不能致主澤民成大功烈何屑屑爲也吾與若居林下以枕簟自隨觴詠自樂雖不官無慊焉官奴然之時稱二逸乾統間官奴卒

蕭蒲离不字桉懶魏國王惠之四世孫父母蚤喪鞠于祖父兀古匿性孝悌年十三兀古匿卒自以早失怙恃復遭祖喪哀毀踰禮族里嘉歎嘗謂人曰我於親不得終養今誰爲訓者苟不自勉何以報鞠育恩自是力學於文藝無不精乾統間以兀古匿之故召之不應常與親識游獵山水奉養無長物僕隸欣欣如也或曰公胡

不念以嗣先世功名答曰自度不足以繼先業年踰強
仕安能益主庇民累徵皆以疾辭晚年謝絕人事卜居
抹古山屏遠葦茹潛心佛書延有道者談論彌日人問
所得何如但曰有深樂惟覺六鑿不相攘餘無知者一
日易服無疾而逝
論曰隱固未易爲也而亦未可輕以與人若札刺謝職
不談時務官奴兩辭節鎮蒲离不召而不赴雖未足謂
之隱然在當時能知內外之分甘於肥遯不猶愈於求
富貴利達而爲妻妾羞者哉故稱卓行可也
遼史卷一百六終

烏古吐蕃吐谷渾鼻骨德皆遣使來貢九月庚子漢遣
使貢藥冬十月巳酉命太師唐骨德治大行皇太后園
陵李胡子宛郎君嵇幹敵烈謀反事覺辭逮太平王罽
撒葛林牙華割郎君新羅等皆執之十一月辛丑諡皇
太后曰貞烈葬祖陵漢遣使來會冬駐蹕奉聖州以南
京水詔免今歲租

四年春正月戊寅回鶻來貢巳丑華割嵇幹等伏誅宛
及罽撒葛皆釋之是月周主威殂養子晉王柴榮嗣立
二月丙午朔周攻漢命政事令耶律敵祿援之丙辰漢
遣使進茶藥幸南京夏五月乙亥忻代二州叛漢遣南

院大王撻烈助敵祿討之丁酉撻烈敗周將符彥卿於
忻口六月癸亥撻烈獻所獲秋七月乙酉漢民有爲遼
軍誤掠者遣使來請詔悉歸之九月丙申漢爲周人所
侵遣使來告冬十一月彰國軍節度使蕭敵烈太保許
從贊奏忻代二州捷十二月辛酉朔謁祖陵庚午漢遣
使來貢是冬駐蹕杏嶺

五年春正月辛未朔鼻骨德來貢二月庚子朔日有食
之庚申漢遣使請上尊號不許壬戌如裏潭夏四月己
酉周侵漢漢遣使求援癸丑命郎君蕭海黎世爲北府
宰相秋九月庚辰漢主有疾遣使來告冬十月壬申女

直來貢丁亥謁太宗廟庚寅南唐遣使來貢十一月乙
未朔漢主崇殂子承鈞遣使來告且求嗣立遣使弔祭
遂封冊之十二月乙丑朔謁太祖廟辛巳漢遣使來議
軍事

六年夏五月丁酉謁懷陵六月甲子漢遣使來議軍事
秋七月不視朝九月戊午謁祖陵冬十一月壬寅鼻骨
德來貢十二月己未朔謁太祖廟

七年春正月庚子鼻骨德來貢二月辛酉南唐遣使奉
蠟丸書辛未駐蹕潢河夏四月戊午朔還上京初女巫
肖古上延年藥方當用男子膽和之不數年殺人甚多

至是覺其妄辛巳射殺之五月辛卯漢遣使來貢六月
丙辰周遣使來聘南唐遣使來貢八月巳未周遣使來
聘是秋不聽政冬十月庚申獵于七鷹山十二月丁巳
詔大臣曰有罪者法當刑朕或肆怒濫及無辜卿等切
諫無或面從辛巳還上京

八年春二月乙丑駐蹕潢河夏四月甲寅南京留守蕭
思溫攻下沿邊州縣遣人勞之五月周陷東城縣六月
辛未蕭思溫請益兵乞駕幸燕秋七月獵于拽刺山迄
于九月射鹿諸山不視朝冬十一月辛酉漢遣使來告
周復來侵乙丑使再至十二月庚辰又至

九年春正月戊辰駐蹕漢河夏四月丙戌周來侵戊戌
以南京留守蕭思溫爲兵馬都總管擊之是月周拔益
津瓦橋淤口三關五月乙巳朔陷瀛莫二州癸亥如南
京辛未周兵退六月乙亥朔視朝戊寅復容城縣庚申
西幸如懷州是月周主榮殂子宗訓立秋七月發南京
軍戍范陽冬十二月戊寅還上京庚辰王子敵烈前宣
徽使海思及蕭達干等謀反事覺鞫之辛巳祀天地祖
考告逆黨事敗丙申召羣臣議時政

十年春正月周殿前都點檢趙匡胤廢周自立建國號
宋夏五月乙巳謁懷陵壬子漢以潞州歸附來告丙寅

至自懷陵六月庚申漢以宋兵圍石州來告遣大同軍節度使阿剌率四部往援詔蕭思溫以三部兵助之秋七月己亥朔宋兵陷石州潞州復叛漢使來告辛酉政事令耶律壽遠太保楚阿不等謀反伏誅以酒脯祀天地于黑山八月如秋山幸懷州庚午以鎮茵石後復擊殺近侍古哥冬十月丙子李胡子喜隱謀反辭連李胡下獄死十一月海思獄中上書陳便宜

十一年春二月丙寅釋喜隱辛亥司徒烏里只子迭刺哥誣告其父謀反復詐乘傳及殺行人以其父請杖而釋之丙辰蕭思溫奏老人星見乞行赦宥閏月甲子如

潢河夏四月癸巳朔日有食之是月射鹿不視朝五月乙亥司天王白李正等進曆六月甲午赦冬十一月歲星犯月

十二年春正月甲戌夜觀燈二月己丑朔以御史大夫蕭護思爲北院樞密使賜對衣鞍馬夏五月庚午以旱命左右以水相沃頃之果雨六月甲午祠木葉山及潢河秋如黑山赤山射鹿

十三年春正月自丁巳晝夜酣飲者九日丙寅宋欲城益津關命南京留守高勳統軍使崔延勳以兵擾之癸酉殺獸人海里二月庚寅漢遣使來告欲巡邊徵乞張

聲援壬辰如潢河癸巳觀羣臣射賜物有差乙巳老人
星見三月癸丑朔殺鹿人彌里吉梟其首以示掌鹿者
夏四月壬寅獵于潢河五月壬戌幹朗改國所進花鹿
生麝六月癸未近侍傷獐杖殺之甲申殺獐人霞馬壬
辰詔諸路錄囚秋七月辛亥朔漢以宋侵來告乙丑薦
時羞於廟八月甲申以生日縱五坊鷹鵠戊戌幸近山
呼鹿射之旬有七日而後返九月庚戌朔以青牛白馬
祭天地飲于野次終夕乃罷辛亥以酒脯祭天地復終
夜酣飲冬十月丙申漢以宋侵來告十一月庚午獵飲
于虞人家凡四日十二月戊子射野鹿賜虞人物有

差庚寅殺蔬人曷主

遼史卷六終

萬曆三十四年刊

遼史卷六

本紀

七

遼史卷一百七

列傳第三十七

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

烈女

男女居室人之大倫與其得烈女不若得賢女天下而
有烈女之名非幸也詩讚衛共姜春秋褒宋伯姬蓋不
得已所以重人倫之變也遼據北方風化視中土爲踈
終遼之世得賢女二烈女三以見人心之天理有不與

世道存亡者

邢簡妻陳氏營州人父陘五代時累官司徒陳氏甫笄涉通經義凡覽詩賦輒能誦尤好吟詠時以女秀才名之年二十歸於簡孝舅姑閨門和睦親黨推重有六子陳氏親教以經後二子抱朴抱質皆以賢位宰相統和十二年卒睿智皇后聞之嗟悼贈魯國夫人刻石以表其行及遷祔遣使以祭論者謂貞靜柔順婦道母儀始終無歎云

耶律氏太師適魯之妹小字常哥幼爽秀有成人風及長操行脩潔自誓不嫁能詩文不苟作讀通曆見前人得失歷能品藻咸雍間作文以述時政其略曰君以民爲體民以君爲心人主當任忠賢人臣當去比周則政化平陰陽順欲懷遠則崇恩尚德欲強國則輕徭薄賦四端五典爲治教之本六府三事寔生民之命淫侈可以爲戒勤儉可以爲師錯枉則人不敢詐顯忠則人不敢欺勿泥空門崇飾土木勿事邊鄙妄廢金帛滿當思溢安必慮危刑罰當罪則民勸善不寶遠物則賢者至建萬世磐石之業制諸部強橫之心欲率下則先正身欲治遠則始朝廷上稱善時樞密使耶律乙辛愛其才屢求詩常哥遺以回文乙辛知其諷已街之大康三年

皇太子坐事乙辛誣以罪按無跡獲免會見適魯謫鎮
州常哥與俱嘗布衣蔬食人問曰何自苦如此對曰皇
儲無罪遭廢我輩豈可美食安寢及太子被害不勝哀
痛年七十卒于家

耶律奴妻蕭氏小字意辛國舅駙馬都尉陶蘇幹之女
母胡獨公主意辛美姿容年二十始適奴事親睦族以
孝謹聞嘗與娣姒會爭言厭魅以取夫寵意辛曰厭魅
不若禮法衆問其故意辛曰脩己以絜奉長以敬事夫
以柔撫下以寬毋使君子見其輕易此之爲禮法自然
取重於夫以厭魅獲寵獨不愧於心乎聞者大慙初奴

與樞密使乙辛有隙及皇太子廢被誣奪爵没入興聖
宮流烏古部上以意辛公主之女欲使絕婚意辛辭曰
陛下以妾葭莩之親使免流竄實天地之恩然夫婦之
義生死以之妾自笄年從奴一旦臨難頓爾乖離背綱
常之道於禽獸何異幸陛下哀憐與奴俱行妾卽死無
恨帝感其言從之意辛久在貶所親執役事雖勞無難
色事夫禮敬有加于舊壽隆中上書乞子孫爲著帳郎
君帝嘉其節召舉家還子國隱乾統間始仕保大中意
辛在臨漢謂諸子曰吾度盧彥倫必叛汝輩速避我當
死之賊至遇害

耶律朮者妻蕭氏小字訛里本國舅孛董之女性端嚴
有容色自幼與他女異年十八歸朮者謹裕貞婉娣姒
推尊之及居朮者喪極哀毀既葬謂所親曰夫婦之道
如陰陽表裏無陽則陰不能立無表則裏無所附妾今
不幸失所天且生必有死理之自然朮者早歲登朝有
才不壽天禍妾身罹此酷罰復何依恃儻死者可見則
從不可見則當與俱侍婢慰勉竟無回意自刃而卒
耶律中妻蕭氏小字接蘭韓國王惠之四世孫聰慧謹
愿年二十歸於中事夫敬順親戚咸譽其德中嘗謂曰
汝可粗知書以前貞淑爲鑑遂發心誦習多涉古今天

慶中爲賊所執潛置刃於履誓曰人欲汙我者卽死之
至夜賊遁而免久之帝召中爲五院都監中謂妻曰吾
本無宦情今不能免我當以死報國汝能從我乎接蘭
對曰謹奉教及金兵徇地嶺西盡徙其民中守節死接
蘭悲戚不形於外人怪之俄躍馬突出至中死所自殺
論曰陳氏以經教二子並爲賢相耶律氏自潔不嫁居
閨闈之內而不忘忠其君非賢而能之乎三蕭氏之節
雖烈丈夫有不能者矣

遼史卷一百七終

遼史卷一百八

列傳第三十八

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

方技

孔子稱小道必有可觀醫卜是已醫以濟天札卜以決
猶豫皆有補於國有惠於民前史錄而不遺故傳
直魯古吐谷渾人初太祖破吐谷渾一騎士棄橐反射
不中而去及追兵開橐視之中得一嬰兒卽直魯古也

因所俘者問其故乃知射橐者嬰之父也世善醫雖馬上視疾亦知標本意不欲子爲人所得欲殺之耳由是進於太祖淳欽皇后收養之長亦能醫專事鍼灸太宗時以太醫給侍嘗撰脉諸鍼灸書行于世年九十卒王白冀州人明天文善卜筮晉司天少監太宗入汴得之應曆十九年王子只沒以事下獄其母求卜白曰此人當王未能殺也母過憂景宗卽位釋其罪封寧王竟如其言凡決禍福多此類保寧中歷彰武興國二軍節度使撰百中歌行于世

魏璘不知何郡人以卜名世太宗得于汴天祿元年上

命馳馬較遲疾以爲勝負問王白及璘孰勝白奏曰赤者勝璘曰臣所見驄馬當勝旣馳竟如璘言上異而問之白曰今日火王故知赤者勝璘曰不然火雖王而上有煙以煙察之青者必勝上嘉之五年察割謀逆私卜于璘璘始卜謂曰大王之數得一日矣宜慎之及亂果敗應曆中周兵犯燕上以勝敗問璘璘曰周姓柴也燕分火也柴入火必焚其言果驗璘嘗爲太平王菴撒葛卜僭立事上聞之免死流烏古部一日節度使召璘適有獻雙鯉者戲曰君卜此魚何時得食璘良久荅曰公與僕不出今日有不測禍奚暇食魚急命烹之未及食

寇至俱遇害

耶律敵魯字撒不椀其先本五院之族始置官分隸焉敵魯精于醫察形色卽知病原雖不診候有十全功統和初爲大丞相韓德讓所薦官至節度使初樞密使耶律斜軫妻有沈痾易數醫不能治敵魯視之曰心有畜熱非藥石所及當以意療因其聾聒之使狂用泄其毒則可於是令大擊鉦鼓於前翌日果狂叫呼怒罵力極而止遂愈治法多此類人莫能測年八十卒

耶律乙不哥字習撚六院郎君裏古直之後幼好學尤長於卜筮不樂仕進嘗爲人擇葬地曰後三日有牛乘

人逐牛過者卽啓土至期果一人負乳犢引犝牛而過其人曰所謂牛乘人者此也遂啓土旣葬吉凶盡如其言又爲失鷹者占曰鷹在汝家東北三十里灤西榆上往求之果得當時占候無不驗

論曰方技術者也苟精其業而不畔于道君子必取焉直魯古王白耶律敵魯無大得失錄之宜矣魏璘爲察割卜謀逆爲罨撒葛卜僭立罪在不貫雖有寸長亦奚足取哉存而弗削爲來者戒

遼史卷一百八終

遼史卷一百九

列傳第三十九

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈灌等
奉

勅重校刊

伶宦

伶官之微者也五代史列鏡新磨於傳是必有所取矣
遼之伶官當時固多然能因恢諧示諫以消末形之亂
惟羅衣輕耳孔子曰君子不以人廢言是宜傳

羅衣輕不知其鄉里滑稽通變一時諧謔多所規諷興

宗敗於李元昊也單騎突出幾不得脫先是元昊獲遼人輒劓其鼻有奔北者惟恐追及故羅衣輕止之曰且觀鼻在否上怒以毳索繫帳後將殺之太子笑曰打諢底不是黃幡綽羅衣輕應聲曰行兵底亦不是唐太宗上聞而釋之上嘗與太弟重元狎昵宴酣許以千秋萬歲後傳位重元喜甚驕縱不法又因雙陸賭以居民城邑帝屢不競前後已償數城重元既恃梁孝王之寵又多鄭叔段之過朝臣無敢言者道路以目一日復博羅衣輕指其局曰雙陸休癡和你都輸去也帝始悟不復戲清寧間以疾卒

宦官

周禮寺人掌中門之禁至巷伯詩列于雅勃貂功著于晉雖忠於所事而非其職矣漢唐中世竊權蠹政有不可忍言者是皆寵遇之過遼宦者二人其賢不肖皆可爲後世鑑故傳焉

王繼恩棣州人睿知皇后南征繼恩被俘初皇后以公私所獲十歲已下兒容貌可觀者近百人載赴涼陘並使闈爲豎繼恩在焉聰慧通書及遼語擢內謁者內侍左廂押班聖宗親政累遷尚衣庫使左承宣監門衛大將軍靈州觀察使內庫都提點繼恩好清談不喜權利

每得賜賚市書至萬卷載以自隨誦讀不倦每宋使來聘繼恩多充宣賜使後不知所終

趙安仁字小喜深州樂壽人自幼被俘統和中爲黃門令秦晉國王府祗候王薨授內侍省押班御院通進開泰八年與李勝哥謀奔南土爲游兵所擒初仁德皇后與欽哀有隙欽哀密令安仁伺皇后動靜無不知者仁德皇后威權旣重安仁懼禍復謀亡歸仁德欲誅之欽哀以言營救聖宗曰小喜言父母兄弟俱在南朝每一念神魂隕越今爲思親冒死而亡亦孝子用心寔可憐憫赦之重熙初欽哀攝政欲廢帝立少子重元帝與安

仁謀遷太后慶州守陵授安仁左承宣監門衛大將軍充契丹漢人渤海內侍都知兼都提點會上思太后親馭奉迎太后責曰汝負萬死我嘗營救不望汝報何爲離間我母子邪安仁無答後不知所終

論曰名器所以礪天下非賢而有功則不可授況宦者乎繼恩爲內謁者安仁爲黃門令似矣何至溺於私愛而授以觀察使大將軍耶易曰負且乘致寇至此安仁所以不克有終繼恩幸而免歟

遼史卷一百九終

遼史卷一百十

列傳第四十

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

姦臣上

春秋褒貶善惡並書示勸懲也故遷固傳佞幸酷吏歐
陽脩則并姦臣錄之將俾為君者知所鑒為臣者知所
戒此天地聖賢之心國家安危之機治亂之原也遼自
耶律乙辛而下姦臣十人其敗國皆足以為戒故列於

傳

耶律乙辛字胡覩衮五院部人父迭刺家貧服用不給部人號窮迭刺初乙辛母方娠夜夢手搏殺羊拔其角尾既寤占之術者曰此吉兆也羊去角尾爲王字汝後有子當王及乙辛生適在路無水以浴迴車破轍忽見湧泉迭刺自以得子欲酒以慶聞酒香于草棘間得二榼因祭東焉乙辛幼慧黠嘗牧羊至日昃迭刺視之乙辛熟寢迭刺觸之覺乙辛怒曰何遽驚我適夢人手執日月以食我我已食月啗日方半而覺惜不盡食之迭刺自是不令牧羊及長美風儀外和內狡重熙中爲文

班吏掌太保印陪從入宮皇后見乙辛詳雅如素宦命補筆硯吏帝亦愛之累遷護衛太保道宗卽位以乙辛先朝任使賜漢人戶四十同知點檢司事常召決疑議陞北院同知歷樞密副使清寧五年爲南院樞密使改知北院封趙王九年耶律仁先爲南院樞密使時駙馬都尉蕭胡覩與重元黨惡仁先在朝奏曰仁先可任西北路招討使帝將從之乙辛奏曰臣新參國政未知治體仁先乃先帝舊臣不可遽離朝廷帝然之重元亂平拜北院樞密使進王魏賜匡時翊聖竭忠平亂功臣咸雍五年加守太師詔四方有軍旅許以便宜從事勢震

中外門下饋賂不絕凡阿順者蒙薦擢忠直者被斥竄
太康元年皇太子始預朝政法度修明乙辛不得逞謀
以事誣皇后后既死乙辛不自安又欲害太子乘間入
奏曰帝與后如天地並位中宮豈可曠盛稱其黨駙馬
都尉蕭霞抹之妹美而賢上信之納于宮尋冊爲皇后
時護衛蕭忽古知乙辛姦狀伏橋下欲殺之俄暴雨壞
橋謀不遂林牙蕭巖壽密奏曰乙辛自皇太子預政內
懷疑懼又與宰相張孝傑相附會恐有異圖不可使居
要地出爲中京留守乙辛泣謂人曰乙辛無過因讒見
出其黨蕭霞抹輩以其言聞於上上悔之無何出蕭巖

壽爲順義軍節度使詔近臣議召乙辛事北面官屬無
敢言者耶律撒刺曰初以蕭巖壽奏出乙辛若所言不
當宜坐以罪若當則不可復召累諫不從乃復召爲北
院樞密使時皇太子以母后之故憂見顏色乙辛黨欣
躍相慶讒謗沸騰忠良之士斥逐殆盡乙辛因蕭十三
之言夜召蕭得裏特謀構太子令護衛太保耶律朮刺
誣告耶律撒刺等同謀立皇太子詔按無迹而罷又令
牌印郎君蕭訛都幹詣上誣首耶律查刺前告耶律撒
刺等事皆實臣亦與其謀本欲殺乙辛等而立太子臣
等若不言恐事白連坐詔使鞠劾乙辛迫令具伏上怒

命誅撒刺及速撒等乙辛恐帝疑引數人庭詰各令荷重校繩繫其頸不能出氣人人不堪其酷惟求速死反奏曰別無異辭時方暑尸不得瘞以至地臭乃囚皇太子於上京監衛者皆其黨尋遣蕭達魯古撒把害太子乙辛黨大喜聚飲數日上京留守蕭撻得以卒聞上哀悼欲召其妻乙辛陰遣人殺之以滅其口五年正月上將出獵乙辛奏留皇孫上欲從之同知點檢蕭兀納諫曰陛下若從乙辛留皇孫皇孫尚幼左右無人願留臣保護以防不測遂與皇孫俱行由是上始疑乙辛頗知其姦會比幸將次黑山之平定上適見扈從官屬多隨

乙辛後惡之出乙辛知南院大王事及例削一字王爵改王混同意稍自安及赴闕入謝帝即日遣還改知興中府事七年冬坐以禁物鬻入外國下有司議法當死乙辛黨耶律燕哥獨奏當入八議得減死論擊以鐵骨朶幽於來州後謀奔宋及私藏兵甲事覺縊殺之乾統二年發塚戮其屍

張孝傑建州永霸縣人家貧好學重熙二十四年擢進士第一清寧間累遷樞密直學士咸雍初坐誤奏事出為惠州刺史俄召復舊職兼知戶部司事三年參知政事同知樞密院事加工部侍郎八年封陳國公上以孝

傑勤幹數問以事爲北府宰相漢人貴幸無比大康元年賜國姓明年秋獵帝一日射鹿三十燕從官酒酣命賦雲上于天詩詔孝傑坐御榻傍上誦黍離詩知我者謂我心憂不知我者謂我何求孝傑奏曰今天下太平陛下何憂富有四海陛下何求帝大悅三年羣臣侍燕上曰先帝用仁先化葛以賢智也朕有孝傑乙辛不在仁先化葛下誠爲得人歡飲至夜乃罷是年夏乙辛諧皇太子孝傑同力相濟及乙辛受詔按皇太子黨人誣害忠良孝傑之謀居多乙辛薦孝傑忠於社稷帝謂孝傑可比狄仁傑賜名仁傑乃許放海東青鶻六年旣出

乙辛上亦悟孝傑姦佞尋出爲武定軍節度使坐私販廣濟湖鹽及擅改詔旨削爵貶安肅州數年乃歸大安中死於鄉乾統初剖棺戮屍以族產分賜臣下孝傑久在相位貪貨無厭時與親戚會飲嘗曰無百萬兩黃金不足爲宰相家初孝傑及第詣佛寺忽迅風吹孝傑幞頭與浮圖齊墜地而碎有老僧曰此人必驟貴然亦不得其死竟如其言

耶律燕哥字善寧季父房之後四世祖鐸穩太祖異母弟父曰豁里斯官至太師燕哥狡佞而敏清寧間爲左護衛太保大康初轉北面林牙初耶律乙辛自中京留

守復爲樞密使以燕哥爲耳目凡聞見必以告乙辛愛而薦之帝亦以爲賢拜左夷離畢及皇太子被誣帝遣燕哥往訊之太子謂燕哥曰帝惟我一子今爲儲嗣復何求敢爲此事公與我爲昆弟行當念無辜達意於帝禱之甚懇蕭十三聞之謂燕哥曰宜以太子言易爲伏狀燕哥領之盡如所教以奏及太子被逐乙辛殺害忠良多燕哥之謀爲契丹行宮都部署五年夏拜南府宰相遷惕隱大安三年爲西京留守致仕壽隆初以疾卒蕭十三茂古乃部人父鐸魯幹歷官節度使十三辨黠善揣摩人意清寧間以年勞遷護衛太保大康初耶律

乙辛復入樞府益橫恣時十三出入乙辛家以朝臣不附者輒使出之十三由宿衛遷殿前副點檢三年夏護衛蕭忽古等謀殺乙辛事覺下獄十三謂乙辛曰今太子猶在臣民屬心大王素無根柢之助復有誣皇后之怨若太子立王置身何地宜熟計之乙辛曰吾憂此久矣是夜召蕭得裏特謀所以構太子事十三計旣行尋遷殿前都點檢兼同知樞密院事復令蕭訛都幹等誣首耶律查刺前告耶律撒刺等事皆實詔究其事太子不服別遣夷離畢耶律燕哥問太子太子具陳所以見誣之狀十三聞之謂燕哥曰如此奏則大事去矣當易

其辭爲伏款燕哥入如十三言奏之上大怒廢太子太子將出曰我何罪至是十三叱令登車遣衛卒闔車門是年遷北院樞密副使復陳陰害太子計乙辛從之及乙辛出知南院大王事亦出十三爲保州統軍使卒乾統間剖棺戮屍二子的里得念經皆伏誅

遼史卷一百十終

遼史卷一百十一

列傳第四十一

元開府儀同三司上柱國前中書右丞相兼修國史都總裁脫脫修

皇明奉訓大夫右春坊右諭德兼翰林院侍講署國子監事臣沈淮等

奉

勅重校刊

姦臣下

蕭余里也字訛都椀國舅阿刺次子便佞滑稽善女工重熙間以外戚進清寧初補祗候郎君尚鄭國公主拜駙馬都尉累遷南面林牙以父阿刺爲蕭革所譖出余里也爲奉先軍節度使十年冬召爲北面林牙咸雍中

會有告余里也與族人木哲謀害耶律乙辛按無狀出
爲寧遠軍節度使自後余里也揣乙辛意傾心事之薦
爲國舅詳穩大康初封遼西郡王時乙辛擅恣凡不附
已者出之乃引余里也爲北府宰相兼知契丹行宮都
部署事及乙辛謀構皇太子余里也多助成之遂知北
院樞密事賜推誠協贊功臣以女姪妻乙辛子綏也恃
勢橫肆至有無君之語朝野側目帝出乙辛知南院大
王事坐與乙辛黨以天平軍節度使歸第尋拜西北路
招討使以母憂去官卒

耶律合魯字胡都董六院舍利裏古直之後柔佞喜苟
合仕清寧初時乙辛引用羣小合魯附之遂見委任俄
擢南面林牙乙辛譖皇太子殺忠直合魯多預其謀弟
吾也亦黨乙辛時號二賊乙辛薦爲北院大王卒吾也
亦至南院大王

蕭得裏特遥輦注可汗宮分人善阿意順色清寧初乙
辛用事甚見引用累遷北面林牙同知北院宣徽使事
及皇太子廢遣得裏特監送上京得裏特促其行不令
下車起居飲食數加陵侮至則築圍堵囚之大康中遷
西南招討使歷順義軍節度使轉國舅詳穩壽隆五年
坐怨望以老免死闔門籍興聖宮貶西北統軍司卒二

子得未訛里乾統間以父與乙辛謀伏誅

蕭訛都幹國舅少父房之後咸雍中補牌印郎君大康三年樞密使乙辛陰懷逆謀乃令護衛太保耶律查剌誣告耶律撒剌等廢立事詔按無狀皆補外項之訛都幹希乙辛意欲實其事與耶律塔不也等入闕誣奏耶律撒剌等謀害乙辛欲立皇太子事臣亦預謀今不自言恐事泄連坐帝果怒徙皇太子于上京訛都幹尚皇女趙國公主爲駙馬都尉後與乙辛議不合銜之復以車服僭擬人主被誅訛都幹臨刑語人曰前告耶律撒剌事皆乙辛教我恐事彰殺我以滅口耳

蕭達魯古遙輦嘲古可汗宮分人性姦險清寧間乙辛爲樞密使竊權用事陰懷逆謀達魯古比附之遂見獎拔稍遷至旗鼓拽剌詳穩乙辛欲害太子以達魯古兇果可使遣與近侍直長撒把詣上京同留守蕭撻得夜引力士至囚室給以有赦召太子出殺之函其首以歸詐云疾薨以達魯古爲國舅詳穩達魯古恐殺太子事白出入常佩刀有急召卽欲自殺乾統間詔樞密使耶律阿思大索乙辛黨人達魯古以賂獲免後以疾卒耶律塔不也仲父房之後以善擊鞠幸於上凡馳騁鞠不離杖咸雍初補祗候郎君與耶律乙辛善故內外畏

之及太子被譖按無迹塔不也附乙辛欲實其誣與訛
都幹等密奏太子謀亂事本實臣不首恐事覺連坐帝
信之廢太子改延慶宮副使壽隆元年爲行宮都部署
天祚嗣位以塔不也黨乙辛出爲特免部節度使及樞
密使耶律阿思大索乙辛舊黨塔不也以賂獲免徙敵
烈部節度使復爲敦睦宮使天慶元年出爲西北路招
討使以疾卒

蕭圖古辭字何寧褚特部人仕重熙中以能稱累遷左
中丞清寧初歷北面林牙改北院樞密副使辨敏善伺
顏色應對合上意皇太后嘗曰有大事非耶律化哥蕭

圖古辭不能決眷遇日隆知北院樞密使事六年出知
黃龍府八年拜南府宰相頃之爲北院樞密使詔許便
宜從事爲人姦佞有餘好聚斂專懷變更法度爲樞密
數月所薦引多爲重元黨與由是免爲庶人後没入興
聖宮卒

論曰舜流共工孔子誅少正卯治姦之法嚴矣後世不
是之察反以爲忠而信任之不至於流毒宗社而未已
道宗之於乙辛是也當其留仁先討重元若真爲國計
者不知包藏禍心待時而發耳一旦專權又得孝傑燕
哥十三爲之腹心故肆惡而無忌憚始誣皇后又殺太

子及其妃其禍之酷良可悲哉嗚呼君之所親莫皇后
太子若也姦臣殺之而不知羣臣言之而不悟一時忠
讜廢戮幾盡雖黑山親見官屬之盛僅削一字王號至
私藏甲兵然後誅之吁乙辛之罪固非一死可謝天下
抑亦道宗不明無斷有以養成之也如蕭余里也輩忘
君黨惡以饗富貴雖幸而死諸牖下其得免於遺臭之
辱哉

遼史卷一百十一終

遼史卷一百十二

列傳第四十二

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

逆臣上

易曰天尊地卑乾坤定矣卑高以陳貴賤位矣貴賤位
而後君臣之分定君臣之分定而後天地和天地和而
後萬化成五帝三王之治用此道也三代而降臣弑其
君者有之子弑其父者有之孔子作春秋以寓王法誅

死者於前懼生者於後其慮深遠矣歐陽脩作唐書創
逾臣傳蓋亦春秋之意也遼叛逆之臣二十有二迹其
事則又有甚焉者然豈一朝一夕之故哉列于傳所以
公天下之貶以示夫戒云

轄底字涅烈袞肅祖孫夷离董帖刺之子幼黠而辯時
險佞者多附之遙輦痕德董可汗時異母兄菴古只爲
迭刺部夷离董故事爲夷离董者得行再生禮菴古只
方就帳易服轄底遂取紅袍貂蟬冠乘白馬而出乃令
黨人大呼曰夷离董出矣衆皆羅拜因行柴冊禮自立
爲夷离董與于越耶律釋魯同知國政及釋魯遇害轄

底懼人圖已挈其二子迭里特朔刮奔渤海僞爲失明
後因毬馬之會與二子奪良馬奔歸國益爲姦惡常以
巧辭獲免太祖將卽位讓轄底轄底曰皇帝聖人由天
所命臣豈敢當太祖命爲于越及自將伐西南諸部轄
底誘刺葛等亂不從者殺之車駕還至赤水城轄底懼
與刺葛俱北走至榆河爲追兵所獲太祖問曰朕初卽
位嘗以國讓叔父辭之今反欲立吾弟何也轄底對曰
始臣不知天子之貴及陛下卽位衛從甚嚴與凡庶不
同臣嘗奏事心動始有窺覷之意度陛下英武必不可
取諸弟懦弱得則易圖也事若成豈容諸弟乎太祖謂

諸弟曰汝輩乃從斯人之言耶迭刺曰謀大事者須用
如此人事成亦必去之轄底不復對囚數月縊殺之將
刑太祖謂曰叔父罪當死朕不敢赦事有便國者宜悉
言之轄底曰迭刺部人衆勢強故多爲亂宜分爲二以
弱其勢子迭里特

迭里特字海隣有膂力善馳射馬躡不仆尤神于醫視
人疾若隔紗覩物莫不悉見太祖在潛已加眷遇及卽
位拜迭刺部夷離董太祖嘗思鹿醢解醒以山林所有
問能取者迭里特曰臣能得之乘內廐馬逐鹿射其一
欲復射馬跌而斃迭里特躍而前弓猶不弛復獲其一

帝歡甚曰吾弟萬人敵會帝患心痛召迭里特視之迭
里特曰膏肓有瘀血如彈丸然藥不能及必鍼而後愈
帝從之嘔出瘀血痛止帝以其親每加賜賚然知其爲
人未嘗任以職後從刺葛亂與其父轄底俱縊殺之

察割字歐辛明王安端之子善騎射貌恭而心狡人以
爲懦大祖曰此兇頑非懦也其父安端嘗使奏事太祖
謂近侍曰此子目若風駝面有反相朕若獨居無令入
門世宗卽位于鎮陽安端聞之欲持兩端察割曰太弟
忌刻若果立豈容我輩永康王寬厚且與劉哥相善宜
往與計安端卽與劉哥謀歸世宗及和議成以功封泰

寧王會安端爲西南面大詳穩察割佯爲父惡陰遣人
白於帝卽召之旣至上前泣訴不勝哀帝憫之使領女
石烈軍出入禁中數被恩遇帝每出獵察割託手疾不
操弓矢但執鍊錘馳走屢以家之細事聞於上上以爲
誠察割以諸族屬雜處不克以逞漸徙廬帳迫於行宮
右皮室詳穩耶律屋質察其姦邪表列其狀帝不信以
表示察割察割稱屋質疾已哽咽流涕帝曰朕固知無
此何至泣耶察割時出怨言屋質曰汝雖無是心因我
過疑汝勿爲非義可也他日屋質又請於帝帝曰察割
捨父事我可保無他屋質曰察割於父旣不孝於君安

能忠帝不納天祿五年七月帝幸太液谷留飲三日察
割謀亂不果帝伐周至詳古山太后與帝祭文獻皇帝
于行宮羣臣皆醉察割歸見壽安王邀與語王弗從察
割以謀告耶律盆都盆都從之是夕同率兵入弑太后
及帝因僭位號百官不從者執其家屬至夜閱內府物
見碼碯盃曰此希世寶今爲我有詫于其妻妻曰壽安
王屋質在吾屬無噍類此物何益察割曰壽安年幼屋
質不過引數奴詰旦來朝固不足憂其黨矧斯報壽安
屋質以兵圍於外察割尋遣人弑皇后于柩前倉惶出
陣壽安遣人諭曰汝等旣行弑逾復將若何有夷离堇

劃者委兵歸壽安王餘衆望之徐徐而往察割知其不濟乃繫羣官家屬執弓矢脅曰無過殺此曹爾叱令速出時林牙耶律敵獵亦在繫中進曰不有所廢壽安王何以興藉此爲辭猶可以免察割曰誠如公言誰當使者敵獵請與菴撒葛同往說之察割從其計壽安王復令敵獵誘察割嚮殺之諸子皆伏誅

婁國字勉辛文獻皇帝之子天祿五年遙授武定軍節度使及察割作亂穆宗與屋質從林牙敵獵計誘而出之婁國手刃察割改南京留守穆宗沉湎不恤政事婁國有覬覦之心誘敵獵及羣不逞謀逆事覺按問不服

帝曰朕爲壽安王時卿數以此事說我今日豈有虛乎婁國不能對及餘黨盡服遂縊於可汗州西谷詔有司擇絕後之地以葬

重元小字字吉只聖宗次子材勇絕人眉目秀朗寡言笑人望而畏太平三年封秦國王聖宗崩欽哀皇后稱制密謀立重元重元以所謀白於上上益重之封爲皇太弟歷北院樞密使南京留守知元帥府事重元處戎職未嘗離輦下先是契丹人犯法例須漢人禁勘受枉者多重元奏請五京各置契丹警巡使詔從之賜以金券誓書道宗卽位冊爲皇太叔免拜不名爲天下兵馬

大元帥復賜金券四頂帽二色袍尊寵所未有清寧九年車駕獵灤水以其子涅魯古素謀與同黨陳國王陳六知北院樞密事蕭胡覩等凡四百餘人誘脅弩手軍陣于帷宫外將戰其黨多悔過効順各自奔潰重元既知失計北走大漠歎曰涅魯古使我至此遂自殺先是重元將起兵帳前雨赤如血識者謂敗亡之兆子涅魯古

涅魯古小字耶魯縮性陰狠興宗一見謂曰此子目有反相重熙十一年封安定郡王十七年進王楚爲惕隱清寧二年出爲武定軍節度使七年知南院樞密使事

說其父重元詐病俟車駕臨問因行弒逾九年秋獵帝用耶律良之計遣人急召涅魯古涅魯古以事泄遽擁兵犯行宮南院樞密使許王仁先等率宿衛士討之涅魯古躍馬突出爲近侍詳穩渤海阿厮護衛蘇射殺之滑哥字斯懶隋國王釋魯之子性陰險初丞其父妾懼事彰與剋蕭臺哂等共害其父歸咎臺哂滑哥獲免太祖卽位務廣恩施雖知滑哥兇途姑示含忍授以惕隱六年滑哥預諸弟之亂事平羣臣議其罪皆謂滑哥不可釋於是與其子痕只俱凌遲而死勅軍士恣取其產帝曰滑哥不畏上天反君弒父其惡不可言諸弟作亂

皆此人教之也

遼史卷一百十二終

遼史卷一百十三

列傳第四十三

元開府儀同三司上柱國前中書右丞相兼修國史都總裁脫脫修

皇明奉訓大夫右春坊右諭德兼翰林院侍講署國子監事臣沈淮等

奉

勅重校刊

逆臣中

蕭翰一名敵烈字寒真相敵魯之子天贊初唐兵圍鎮州節度使張文禮遣使告急翰受詔與康末怛往救克之殺其將李嗣昭拔石城會同初領漢軍侍衛八年伐晉敗晉將杜重威追至望都翰奏曰可令軍下馬而

射帝從其言軍士步進敵人持短兵猝至我軍失利帝
悔之曰此吾用言之過至此及從駕入汴爲宣武軍節
度使會帝崩樂城世宗卽位翰聞之委事於李從敏徑
趨行在是年秋世宗與皇太后相拒於潢河橫渡和議
未定太后問翰曰汝何怨而叛對曰臣母無罪太后殺
之以此不能無憾初耶律屋質以附太后被囚翰聞而
快之卽囚所謂曰汝嘗言我輩不及今在狴犴何也對
曰第願公不至如此翰默然天祿二年尚帝妹阿不里
後與天德謀反下獄復結惕隱劉哥及其弟盆都亂耶
律石剌告屋質屋質遽入奏之翰等不伏帝不欲發其

事屋質固諍以爲不可乃詔屋質鞫案翰伏辜帝竟釋
之復與公主以書結明王安端反屋質得其書以奏翰
伏誅

牒蠟字述蘭六院夷離董蒲古只之後天顯中爲中臺
省右相會同二年與趙思溫持節冊晉帝及我師伐晉
至滹沱河降晉將杜重威牒蠟功居多同元年平相
州之叛斬首數萬級世宗卽位遣使馳報仍命牒蠟執
偏將朮者以來其使誤入朮者營朮者得詔反誘牒蠟
執送太后牒蠟亡歸世宗和約旣成封燕王爲南京留
守天祿五年察割弒逾牒蠟方醉其妻扶入察割之幕

因從之明日壽安王討亂凡脅從者皆棄兵降牒蠟不
降陵遲而死妻子皆誅

朗字歐新季父房菴古只之孫性輕佻多力人呼爲虎
斯天顯間以材勇進每戰輒克由是得名會同九年太
宗入汴命知澶淵控扼河渡天祿元年燕趙以南皆應
劉知遠朗與汴守蕭翰棄城歸闕先是朗祖菴谷只爲
其弟轄底詐取表离董自是族中無任六院職事者世
宗不悉其事以朗爲六院大王及察割作亂遣人報朗
曰事成矣朗遣詳穩蕭胡里以所部軍往命曰當持兩
端助其勝者穆宗卽位伏誅籍其家屬

劉哥字明隱太祖兄寅底石之子幼驕狠好陵侮人長
益兇狡太宗惡之使守邊徼累遷西南邊大詳穩會同
十年叔父安端從帝伐晉以病先歸與劉哥鄰居世宗
立於軍中安端議所往劉哥首建附世宗之策以本部
兵助之時太后命皇太弟李胡率兵而南劉哥安端遇
于泰德泉旣接戰安端墜馬王子天德馳至欲以槍刺
之劉哥以身衛安端射天德貫甲不及膚安端得馬復
戰太弟兵敗劉哥與安端朝於行在及和議成太后問
劉哥曰汝何怨而叛對曰臣父無罪太后殺之以此怨
耳事平以功爲惕隱天祿中與其弟益都王子天德侍

衛蕭翰謀反耶律石刺發其事劉哥以飾辭免後請帝
博欲因進酒弑逾帝覺之不果被囚一日召劉哥鎖項
以博帝問汝實反耶劉哥誓曰臣若有反心必生千頂
疽死遂貫之耶律屋質固諍以爲罪在不赦上命屋質
按之具服詔免死流烏古部果以千頂疽死弟盆都
盆都殘忍多力膚若蛇皮天祿初以族屬爲皮室詳穩
二年與兄劉哥謀反免死使於轄戛斯國既還復預察
割之亂陵遲而死異母弟二人化葛里奚蹇應曆初無
職任以族子甚見優禮三年或告化葛里奚蹇與衛王
宛謀逆下獄飾辭獲免四年春復反伏誅

海思字鐸袞隋國王釋魯之庶子機警口辯會同五年
詔來直言時海思年十八衣羊裘乘牛詣闕有司問曰
汝何故來對曰應詔言事苟不以貧稚見遺亦可備直
言之選有司以聞會帝將出獵使謂曰俟吾還則見之
海思曰臣以陛下急於求賢是以來耳今反緩於獵請
從此歸帝聞卽召見賜坐問以治道命明王安端與耶
律頗德試之數日安端等奏曰海思之材臣等所不及
帝召海思問曰與汝言者何如人也對曰安端言無收
檢若空車走峻坂頗德如著靴行曠野射鵝帝大笑擢
宣徽使屢任以事帝知其貧以金器賜之海思卽散於

親友後從帝伐晉有功世宗卽位於軍中皇太后以兵
逆於潢河橫渡太后遣耶律屋質責世宗自立屋質至
帝前諭旨不屈世宗遣海思對亦不遜且命之曰汝見
屋質勿懼海思見太后還不稱旨旣和領太后諸局事
穆宗卽位與冀王敵烈謀反死獄中

敵獵字烏輦六院夷裔董木不魯之子少多詐世宗卽
位爲郡牧都林牙察割謀亂官僚多被囚繫及壽安王
與耶律屋質率兵來討諸黨以次引去察割度事不成
卽詣囚所持弓矢脅曰悉殺此曹敵獵進曰殺何益於
事竊料屋質將立壽安王故爲此舉且壽安未必知若

遣人藉此爲辭庶可免察割曰如公言誰可使者敵獵
曰大王若不疑敵獵請與菴撒葛同往說之察割遣之
壽安王用敵獵計誘殺察割凡被脅之人無一被害者
皆敵獵之力亂旣平帝嘉賞然未顯用敵獵失望居常
怏怏結羣不逞陰懷不軌應曆二年與其黨謀立婁國
事覺陵遲死

蕭革小字滑哥字胡突董國舅房林牙和尚之子警悟
多智數太平初累遷官職游近習間以諛悅相比昵爲
流輩所稱由是名達於上重熙初拜北面林牙十二年
爲北院樞密副使帝嘗與近臣宴謂革曰朕知卿才故

自拔擢卿宜勉力革曰臣不才誤蒙聖知無以報萬一
惟竭愚衷安敢怠明年拜北府宰相十五年改同知北
院樞密事革怙寵專權同僚具位而已時夷離畢耶律
義先知革姦佞因侍燕言革所短用之將敗事帝不聽
一日上令義先對革巡擲義先酒酣曰臣備位大臣縱
不能進忠去佞安能與賊博乎革銜之佯言曰公相謔
不旣甚乎義先詬詈不已帝怒皇后解之曰義先酒狂
醒可治也翌日上詔革謂曰義先無禮可痛繩之革曰
義先之才豈逃聖監然天下皆知忠直今以酒過爲罪
恐拂人望帝以革犯而不校眷遇益厚其矯情媚上多

此類拜南院樞密使詔班諸王上封吳王改知北院進
王鄭兼中書令帝大漸詔革曰大位不可一日曠朕若
弗寤宜卽令燕趙國王嗣位清寧元年復爲南院樞密
使更王楚復徙北院與國舅蕭阿剌同掌朝政革多私
撓阿剌每裁正之由是有隙出阿剌爲東京留守會南
郊阿剌以例赴闕帝訪羣臣以時務阿剌陳利病言甚
激切革伺帝意不悅因譖曰阿剌恃寵有慢上心非臣
子禮帝大怒縊阿剌于殿下後上知革姦計寵遇漸衰
八年致仕封鄭國王九年秋革以其子爲重元壻革預
其謀陵遲殺之

遼史卷一百十三
列傳
五

遼史卷一百十三終

遼史卷一百十四

列傳第四十四

元開府儀同三司上柱國前中書右丞相兼修國史都總裁脫脫修

皇明奉訓大夫右春坊右諭德兼翰林院侍講署國子監事臣沈淮等

奉

勅重校刊

逆臣下

蕭胡覩字乙辛口吃視斜髮鬣伯父孝穆見之曰是兒
狀貌族中未嘗有及壯魁梧桀傲多揚人惡重熙中為
祗候郎君俄遷興聖宮使尚秦國長公主授駙馬都尉
以不諧離婚復尚齊國公主為北面林牙清寧中歷北

萬曆三十四年刊
遼史卷一百十四
列傳
一

南院樞密副使代族兄木哲爲西北路招討使時蕭革與蕭阿剌俱爲樞密使不協革以木哲爲阿剌所愛嫉之木哲受代赴闕先嘗借官粟留直而去胡覲希革意發其事木哲因得罪胡覲又欲要權歲時獻遺珍玩畜產于革二人相愛過于兄弟胡覲族弟敵烈爲北剋薦國舅詳穩蕭胡篤于胡覲胡覲見其辨給壯勇傾心交結每遇休沐言論終日人皆怪之會胡覲同知北院樞密事奏胡篤及敵烈可用帝以敵烈爲旗鼓拽刺詳穩胡篤爲宿直官及革構陷其兄阿剌胡篤陰爲之助時人醜之耶律乙辛知北院樞密事胡覲位在乙辛下意

怏怏不平初胡覲嘗與重元子涅魯古謀逆欲其速發會車駕獵太子山遂與涅魯古脅弩手軍犯行宮旣戰涅魯古中流矢而斃衆皆逃散時同黨耶律撒刺竹適在圍場聞亂率獵夫來援其黨謂胡覲等曰我軍甚衆乘其無備中夜決戰事冀有成若至明日其誰從我胡覲曰倉卒中黑白不辨若內外軍相應則吾事去矣黎明而發何遲之有重元聽胡覲之計令四面巡警待旦是夜同黨立重元僭位號胡覲自爲樞密使明日戰敗胡覲被創單騎遁走至十七樂投水死五子同日誅之蕭迭里得字胡覲董國舅少父房之後父雙古尚鈿匿

公主仕至國舅詳穩迭里得幼警敏不羈好射獵太平
中以外戚補祗候郎君歷延昌宮使殿前副點檢重熙
十三年伐夏迭里得將偏師首入敵境多所俘掠遷都
點檢改烏古敵烈部都詳穩十八年再舉西伐迭里得
奏軍馬器械之事務在選將夏人豈爲難制但嚴設斥
堠不用掩襲計何慮不勝帝曰卿其速行無後軍期旣
而迭里得失利還復爲都點檢十九年夏人來侵金肅
軍上遣迭里得率輕兵督戰至河南三角川斬候者八
人擒觀察使以功命知漢人行宮都部署事出爲西南
面招討使族弟黃八家奴告其主私議宮掖事迭里得

寢之事覺決大杖削爵爲民清寧中上以所坐事非迭
里得所犯起爲南京統軍使至是從重元子涅魯古等
亂敗走被擒伏誅

古迭本宮分人不知姓氏好戲狎不喜繩檢膂力過人
善擊鞠重熙初爲護衛歷宿直官十三年西征以古迭
爲先鋒夏人伏兵掩之古迭力戰麾下士多歿乃單騎
突出遇夏王李元昊來圍勢甚急古迭馳射應弦輒仆
躍馬直擊中堅夏兵不能當晡乃還營改興聖宮太保
清寧九年從重元涅魯古亂與扈從兵戰敗而遁追擒
之陵遲而死

撒刺竹孟父房滌冽之孫性兇暴清寧中累遷宣徽使
改殿前都點檢首與重元謀亂會帝獵灤河重元恐事
泄與扈從軍倉卒而戰其子涅魯古既死同黨潰散撒
刺竹適在畋所聞亂劫獵夫以援既至知涅魯古已死
大悔恨之謂曰我輩惟有死戰胡爲若兒戲自取殞滅
今行宮無備乘夜劫之大事可濟若俟明旦彼將有備
安知我衆不携貳一失機會悔將奚及重元蕭胡覩等
曰今夕但可四面圍之勿令外軍得入彼何能備不從
遲明投杖而走撒刺竹戰死

而勇與其兄鼈里刺齊名大安中車駕幸中京補護衛
稍遷鐵鷄軍詳穩天慶間徙北女直詳穩兼知咸州路
兵馬事改東京統軍旣而諸蕃入寇悉破之遷奚六部
大王兼總知東路兵馬事保大二年金兵至天祚播遷
回鹘保率吏民立秦晉國王淳爲帝淳僞署回鹘保知
北院樞密事兼諸軍都統屢敗宋兵淳死其妻普賢女
攝事是年金兵由居庸關入回鹘保知北院卽箭筈山
自立號奚國皇帝改元天復設奚漢渤海三樞密院改
東西節度使爲二王分司建官時奚人巴輒韓家奴等
引兵擊附近契丹部落劫掠人畜羣情大駭會回鹘保

爲郭藥師所敗一軍離心其黨耶律阿古哲與其甥乙室八斤等殺之僞立凡八月

蕭特烈字訛都椀遥輦洼可汗官分人乾統中入宿衛出爲順義軍節度使天慶四年同知咸州路兵馬事五年以兵敗奪節度使保大元年遷隗古部節度使及天祚在山西集羣牧兵特烈爲副統軍聞金兵將至特烈諭士卒以君臣之義死戰于石輦鐸金兵不戰特烈伺間欲攻之天祚喜甚召嬪御諸子登高同觀將詫之金兵望日月旗知天祚在其下以勁兵直趨奮擊無敢當者天祚遁走特烈所至招集散亡尋爲中軍都統復敗

于梯已山天祚決意渡河奔夏從臣切諫不聽人情惶懼不知所爲特烈陰謂耶律兀直曰事勢如此億兆離心正我輩效節之秋不早爲計柰社稷何遂共劫梁王雅里奔西北諸部僞立爲帝特烈自爲樞密使雅里卒欲擇可立者會耶律兀直言木烈才德純備兼興宗之孫衆皆曰可遂僭立焉特烈僞職如故未三旬與木烈俱爲亂兵所殺

論曰遼之秉國鈞握兵柄節制諸部帳非宗室外戚不使豈不以爲帝王久長萬世之計哉及夫肆叛逆致亂亡皆是人也有國家者可不深戒矣乎

遼史卷一百十四終

遼史卷一百十五

二國外紀第四十五

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

高麗

高麗自有國以來傳次久近人民土田歷代各有其志
然高麗與遼相為始終二百餘年自太祖皇帝神冊間
高麗遣使進寶劔天贊三年來貢太宗天顯二年來貢
會同二年受晉上尊號冊遣使往報聖宗統和三年秋

七月詔諸道各完戎器以備東征高麗八月以遼澤沮
如罷師十年以東京留守蕭恒德伐高麗十一年王治
遣朴良柔奉表請罪詔取女直國鴨淥江東數百里地
賜之十二年入貢三月王治遣使請所俘生口詔續還
之仍遣使撫諭十二月王治進妓樂詔却之十三年治
遣李周楨來貢又進鷹十月遣李知白奉貢十一月遣
使冊治爲王遣童子十人來學本國語十四年王治表
乞爲婚姻以東京留守駙馬蕭恒德女下嫁之六月遣
使來問起居自是至者無時十五年韓彥敬來納聘幣
帛駙馬蕭恒德妻越國公主薨十一月治薨其姪誦遣

王同穎來告十二月遣使致祭詔其姪記權知國事十
六年遣使冊誦爲王二十年誦遣使賀伐宋之捷七月
來貢本國地里圖二十二年以南伐事詔諭之二十三
年高麗聞與宋和遣使來賀二十六年進龍鬚草席及
賀中京城二十七年承天皇后崩遣使報以國哀二
十八年誦遣魏守愚等來祭三月使來會葬五月高麗
西京留守康肇弑其主誦擅立誦從兄詢八月聖宗自
將伐高麗報宋遣引進使韓杞宣問詢奉表乞罷師
不許十一月大軍渡鴨淥江康肇拒戰于銅州敗之肇
復出右皮室詳穩耶律敵魯擒肇等追奔數十里獲所

棄糧餉鎧仗銅霍貴寧等州皆降詢上表請朝許之禁
軍士俘掠以政事舍人馬保祐爲開京留守安州團練
使王八爲副留守太子太師乙凜將騎兵一千送保祐
等赴京守將卓思正殺我使者韓喜孫等十人領兵出
拒保祐等復還乙凜領兵擊之思正遂奔西京圍之五
日不克駐驛于城西佛寺高麗禮部郎中渤海隋失來
降遣排押盆奴攻開京遇敵于京西敗之詢棄城遁走
遂焚開京至清江而還二十九年正月班師所降諸城
復叛至貴德州南嶺谷大雨連日霽乃得渡馬馳皆疲
乏甲仗多遺棄次鴨淥江以所俘人分置諸陵廟餘賜

內戚大臣開泰元年詢遣蔡忠順來乞稱臣如舊詔詢
親朝八月遣田拱之奉表稱病不能朝詔復取六州之
地二年耶律資忠使高麗取地未幾還三年資忠復使
如前索地五月詔國舅詳穩蕭敵烈東京留守耶律團
石等造浮梁于鴨淥江城保宣義定遠等州四年命北
府宰相劉慎行爲都統樞密使耶律世良爲副殿前都
點檢蕭虛烈爲都監慎行挈家邊上致緩師期追還之
以世良虛烈總兵伐高麗五年世良等與高麗戰于郭
州西破之六年樞密使蕭合卓爲都統漢人行宮都部
署王繼忠爲副殿前都點檢蕭虛烈爲都監進討蕭合

卓攻興化軍不克師還七年詔東平郡王蕭排押爲都
統蕭虛烈爲副統東京留守耶律八哥爲都監復伐高
麗十二月蕭排押與戰于茶陁二河之間我軍不利天
雲右皮室二軍沒溺者衆天雲軍詳穩海里遙輦帳詳
穩阿果達客省使酌古渤海詳穩高清明等皆沒于陣
八年詔數排押討高麗罪釋之加有功將校益封戰沒
將校之妻錄其子弟以南皮室有功賜衣物銀絹有差
出金帛賜有里涅哥二奚軍八月遣郎君曷不呂等率
諸部兵會大軍同討高麗詢遣使來乞貢方物九年資
忠還以詢降表進釋詢罪太平元年詢薨遣使來報嗣

位卽遣使冊王欽爲王九年賜欽物十一年聖宗崩遣
使告哀七月使來慰奠興宗重熙七年來貢十二年三
月以加上尊號來賀十三年遣使來貢三十四年三月
又來貢十五年入貢八月王欽薨遣使來告十六年來
貢明年又來貢十九年復貢六月遣使來賀伐夏之捷
二十二年入貢二十三年四月王徽請官其子詔加檢
校太尉興宗崩道宗卽位清寧元年八月遣使報國哀
以先帝遺留物賜之十一月使來會葬二年三年皆來
貢四年春遣使報太皇太后哀五月使來會葬七年八
年來貢十二月以佛經一藏賜徽九年十年來貢太康

元年三月皇太后崩遣使報哀六月使來弔祭四年王
徽乞賜鴨綠江以東地不許九年八月王徽薨以徽子
三韓國公勳權知國事十二月勳薨大安元年冊勳子
運爲國王二年遣使來謝封冊三年來貢四年三月免
歲貢五年六年連貢九年賜王運羊十年運薨子昱遣
使來告卽賻贈壽隆元年來貢十一月王昱病命其子
顯權知國事二年來貢三年三月王昱薨五年王顯乞
封冊六年封顯爲三韓國公七年道宗崩天祚卽位改
爲乾統元年報道宗哀使來慰奠十二月遣使來賀五
年三韓國公顯薨子侯遣使來告八月封侯爲三韓國

公贈其父顯爲國王十二月遣使來謝九年來貢天慶
二年王侯母薨來告遣使致祭起復三年遣使來謝致
祭又來謝起復十年乞兵于高麗以禦金而金人責之
至是遼國亡矣

西夏

西夏本魏拓跋氏後其地則赫連國也遠祖思恭唐季
受賜姓曰李涉五代至宋世有其地至李繼遷始大據
夏銀綏宥靜五州緣境七鎮其東西二十五驛南北十
餘驛子德明曉佛書通法律嘗觀太一金鑑訣野戰歌
製番書十二卷又製字若符篆其俗衣白窄衫氍冠冠

後垂紅結綬自號鬼名設官分文武其冠用金縷貼間起雲銀紙帖緋衣金塗銀帶佩蹀躞解錐短刀弓矢穿靴禿髮耳重環紫旋襪六襲出入乘馬張青蓋以二旗前引從者百餘騎民庶衣青綠革樂之五音爲一音裁禮之九拜爲三拜凡出兵先卜有四一炙勃焦以艾灼羊胛骨二擗筭擗竹于地以求數若揲著然三呪羊其夜牽羊焚香禱之又焚穀火于野次晨屠羊腸胃通則吉羊心有血則敗四矢擊絃聽其聲知勝負及敵至之期病者不用醫藥召巫者送鬼西夏語以巫爲廝也或遷他室謂之閃病喜報仇有喪則不伐人負甲葉於背

識之仇解用雞猪犬血和酒貯於髑髏中飲之乃誓曰若復報仇穀麥不收男女禿癩六畜死蛇入帳有力小不能復仇者集壯婦享以牛羊酒食趨讎家縱火焚其廬舍俗曰敵女兵不祥輒避去訴于官官擇舌辨氣直之人爲和斷官聽其屈直殺人者納命價錢百二十干土產大麥華豆青裸床子古子蔓鹹地蓬實蕞蓉苗小蕪萋席雞草子地黃葉燈廂草沙葱野韭拒灰蓀白蒿鹹地松實民年十五爲丁有二丁者取一爲正軍負擔雜使一人爲抄四丁爲兩抄餘人得射它丁皆習戰鬪正軍馬馳各一每家自置一家團練使上張弓矢各一

馬五百疋橐駝一旗鼓五槍劔棍楛杪袋雨氈渾脫鍬
鏤箭牌鐵箠各一刺史以下人各一駝箭三百毛幕
一餘兵三人共一幕有砲手二百人號潑喜勇健者號
撞令郎齋糧不過一旬晝則舉煙揚塵夜則燐火爲候
若獲人馬射之號曰殺鬼招魂或射草縛人出軍用單
日避晦日多立虛寨設伏兵衣重甲乘善馬以鐵騎爲
前鋒用鈎索絞聯雖死馬上不落其民俗勇悍衣冠騎
乘土產品物子姓傳國亦畧知其大槩耳初西夏臣宋
有年賜姓曰趙迨遼聖宗統和四年繼遷叛宋始來附
遼授特進檢校太師都督夏州諸軍事遂復姓李十月

遣使來貢六年入貢七年來貢以王子帳耶律襄之女
封義成公主下嫁繼遷八年正月來謝三月又來貢九
月繼遷遣使獻宋俘十月以敗宋軍來告十二月下宋
麟鄜等州來告遣使封繼遷爲夏國王九年二月遣使
告伐宋之捷四月遣李知白來謝封冊七月復銀綏二
州來告十月繼遷以宋所授敕命遣使來上是月定難
軍節度使李繼捧來附授開府儀同三司檢校太師兼
侍中封西平王仍賜推忠效順啓聖定難功臣十二月
繼遷潛附于宋遣韓德威持詔諭之十年二月韓德威
還奏繼遷託故不出至靈州俘掠以還西夏遣使來奏

通鑑卷一百一十五 十一
德威俘掠賜詔撫諭十月來貢十二年入貢十三年敗
宋師遣使來告十四年又來貢十五年三月以破宋兵
來告封繼遷爲西平王六月遣使來謝封冊十六年來
貢十八年授繼遷子德明朔方軍節度使十九年遣李
文冀來貢六月奏下宋恒環慶三州賜詔褒美二十年
遣使來進馬駝六月遣劉仁勗來告下靈州二十一年
繼遷薨其子德昭遣使來告六月贈繼遷尚書令遣西
上閣門使丁振弔慰八月德昭遣使來謝弔贈二十二
年三月德昭遣使上繼遷遺留物七月封德昭爲西平
王十月遣使來謝封冊二十三年下宋青城來告二十

五年德昭母薨遣使弔祭起復二十七年承天皇帝太后
崩遣使報哀于夏二十八年遣使冊德昭爲夏國王開
泰元年德昭遣使進良馬二年遣引進使李延弘賜夏
國王李德昭及義成公主車馬太平元年來貢十一年
聖宗崩報哀于夏德昭遣使來進賻幣興宗卽位以興
平公主下嫁李元昊以元昊爲駙馬都尉重熙元年夏
國遣使來賀李德昭薨冊其子夏國公元昊爲王二年
來貢十二月禁夏國使公路私市金鐵七年來貢李元
昊與興平公主不諧公主薨遣北院承旨耶律庶成持
詔問之九年宋遣郭禎以伐夏來報十年夏國獻所俘

宋將及生口十一年遣使問宋興師伐夏之由十二月
禁吐渾鬻馬于夏沿邊築障塞以防之十二年正月遣
樞密都承旨王惟吉諭夏國與宋和二月元昊以加上
尊號遣使來賀耶律敵烈等使夏國還奏元昊罷兵遣
使報宋四月夏國遣使進馬駝七月元昊上表請伐宋
不從十月夏人侵党項遣延昌宮使高家奴讓之十三
年四月党項及山西部節度使屈烈以五部叛入西夏
詔徵諸道兵討之六月阻卜子烏八執元昊八月夏使
對不以情羈之使復來詢事宜不實對答之十月元昊
上表請罪欲收集叛黨以獻從之進方物命北院樞密

副使蕭革逐之元昊親率党項三部來降詰其納叛背
盟元昊伏罪初夏人執蕭胡覩至是請以被執者來歸
詔所留夏使亦還其國十二月胡覩來歸又遣使來貢
十七年元昊薨其子諒祚遣使來告上其父遺留物鐵
不得國乞以本部軍助攻夏國不許十八年復議伐夏
留其賀正使不遣遣北院樞密副使蕭惟信以伐夏告
宋六月夏國遣使來貢留之七月親征八月渡河夏人
遁九月蕭惠爲夏人所敗十月招討使耶律敵古率阻
卜軍至賀蘭山獲元昊妻及其官屬遇其軍三千來拒
殪之詳穩蕭慈氏奴南剋耶律幹里歿于陣十九年正

月遣使問罪于夏夏將洼普等攻之肅城耶律高家奴等破之洼普被創遁去殺猥貨乙靈紀三月殿前都點檢蕭迭里得與夏軍戰于三角川敗之招討使蕭蒲奴北院大王宜新等帥師伐夏都部署別古得爲監戰五月蕭蒲奴等入夏境不遇敵縱軍俘掠而還夏國洼普來降十月李諒祚母遣使乞依舊稱臣十二月諒祚上表如母訓二十年二月遣使索党項叛戶五月蕭爻括使夏回進諒祚母表乞代党項權進馬駝牛羊等物又求唐隆鎮仍乞罷所建城邑以詔答之六月獲元昊妻及俘到夏人置于蘇州二十一年十月諒祚遣使乞弛

邊備遣爻括賫詔諭之二十二年七月諒祚進降表遣林牙高家奴賫詔撫諭二十三年正月貢方物五月乞進馬駝詔歲貢之七月諒祚遣使求婚十月進誓表與宗崩遣使報哀于夏二十四年道宗卽位清寧元年遣使來賀九月以先帝遺物賜夏四年四月遣使會葬九年正月禁民鬻銅于夏咸雍元年五月來貢三年十一月遣使進回鶻僧金佛梵覺經十二月諒祚薨四年二月諒祚子秉常遣使報哀卽遣使弔祭秉常上其父遺物十月冊秉常爲夏國王十二月來貢五年七月遣使來謝封冊十一月秉常乞賜印綬九年遣使來貢大康

二年正月仁懿皇后崩遣使報哀于夏以皇太后遺物賜之遣使來弔祭五年來貢八年二月遣使以所獲宋將張天益來獻大安元年十月秉常遣使報其母哀二年十月秉常薨遣使詔其子乾順知國事十二月李乾順遣使上其父秉常遺物四年七月冊乾順爲夏國王五年六月遣使來謝封冊八年六月夏爲宋所侵遣使乞援壽隆三年六月以宋人置壁壘于要地遣使來告四年六月求援十一月遣樞密直學士耶律儼使宋諷與夏和夏復遣使來求援五年正月乾順伐拔母思等部十一月夏以宋人罷兵遣使來謝六年十一月遣使

請尚公主七年道宗崩遣使告哀于夏遣使來慰奠天祚卽位乾統元年夏遣使來賀二年復請尚公主又以爲宋所侵遣李造福田若水來求援三年復遣使請尚公主十月使復來求援四年五年李造福等至乞援以族女南仙封成安公主下嫁乾順六年正月遣牛溫舒使宋令歸所侵夏地六月遣李造福來謝八年乾順以成安公主生子遣使來告九年以宋不歸地來告十年遣李造福等來貢天慶三年六月來貢保大二年天祚播遷乾順率兵來援爲金師所敗乾順請臨其國六月遣使冊乾順爲夏國皇帝而天祚被執歸金矣

遼史卷一百十五
外編 十一
論曰高麗西夏之事遼雖嘗請昏下嫁烏足以得其固志哉三韓接壤反覆易知涼州負遠納叛侵疆乘隙輒動貢使方往事釁隨生與師問罪屢煩親征取勝固多敗亦貽悔昔吳趙咨對魏之言曰大國有征伐之兵小國有備禦之固豈其然乎先王柔遠以德而不以力尚矣遼亡求援二國雖能出師豈金敵哉

遼史卷一百十五終

遼史卷一百十六

國語解第四十六

元開府儀同三司上柱國前中書右丞相兼修國史都總裁脫脫修
皇明奉訓大夫右春坊右諭德兼翰林院侍講署國子監事臣沈淮等
奉

勅重校刊

國語解

史自遷固以迄晉唐其爲書雄深浩博讀者未能盡曉於是裴駙顏師古李賢何超董衝諸儒訓詁註釋然後制度名物方言奇字可以一覽而周知其有助於後學多矣遼之初興與奚室韋密邇土俗言語大槩近俚至

太祖太宗奄有朔方其制雖參用漢法而先世奇首遙輦之制尚多存者子孫相繼亦遵守而不易故史之所載官制宮衛部族地理率以國語爲之稱號不有註釋以辨之則世何從而知後何從而考哉今卽本史參互研究撰次遼國語解以附其後庶幾讀者無齟齬之患云

帝紀

太祖紀

耶律氏

蕭氏

本紀首書太祖姓耶律氏繼書皇后蕭氏則有國之初已分二姓矣有謂始興之地曰世里譯者以世里爲耶律故國族皆以耶律爲姓有謂述律皇后兄子名蕭翰者爲宣武軍節度使其妹復爲皇后故后族皆以蕭爲姓其說與紀不合故陳大任不取又有言以漢字書者曰耶律蕭以契丹字書者曰移刺石抹則亦無可考矣

霞瀨益石烈

鄉名諸宮下皆有石烈設官治之

彌里

鄉之小者

撻馬狻沙里

撻馬人從也沙里郎君也管率衆人之官後有止稱撻馬者

大迭烈特

卽迭刺部之府也初阻午可汗與其弟撒里本領之及太祖以部夷离董卽位因強大難制析爲二院烈刺音相近

夷离董

統軍馬大官會同初改爲大王

集會塢下窩陀二音

地名

阿主沙里

阿主父祖稱

惕隱

典族屬官卽宗政職也

奚霄下音習

國名中京地也

黑車子

國也以善製車帳得名契丹之先嘗遣人往學之

于越

貴官無所職其位居北南大上非有大功德者不授

鷹軍

鷹鷲以之名軍取捷速之義後託龍軍虎軍鐵鷄軍者倣此

温娘改

上音九

地名

西樓

遼有四樓在上京者曰西樓木葉山曰南樓龍化州曰東樓唐州曰北樓歲時遊獵常在四樓間

阿點夷离的

阿點貴稱夷离的大臣夫人之稱

糺轄

糺軍名轄者管束之義

夷离畢

卽參知政事後置夷离畢院以掌刑政宋刀

射鬼箭
約使遼有詩云押宴夷离畢知其爲執政官

凡帝親征服介冑祭諸先帝出則取死囚一人置所向之方亂矢射之名射鬼箭以祓不祥及班師則射所俘後因爲刑法之用

暴里

惡人名也

大小鵠軍

二室韋軍號也

神纛

從者所執以旄牛尾爲之纓槍屬也

龍眉宮

太祖取天梯蒙國別魯三山之勢于葦淀射金靛箭以識之名龍眉宮神冊三年築都城于其地臨潢府是也靛測角切箭名

峭里

室韋部名

君基太乙神

福神名其神所臨之國君能建極孚于上下則治化升平民享多福

撻林

官名後二室韋部改爲僕射又名司空

舍利

契丹豪民要裹頭巾者納牛駝十頭馬百匹乃給官名曰舍利後遂爲諸帳官以郎君繫之

阿廬朶里

一名阿魯敦

貴顯名遼于越官兼此者惟曷魯耳

選底

王獄官

常袞

官名掌遥輦部族戶籍等事奚六部常袞掌

奚之族屬

謹譔

渤海國主名

尅釋魯

尅官名釋魯人名後尅朗尅臺晒倣此

烏魯古阿里只

太祖受述律婦受謹譔降時所乘二馬名也因賜謹譔夫婦以爲名

太宗紀

箭筈山

筈音箭

胡損奚所居

柴冊

禮名積薪為壇受羣臣玉冊禮畢燔柴祀天
阻午可汗制也

遙輦氏九帳

遙輦九可汗宮分

北尅南尅

掌軍官名猶漢南北軍之職

祭麋鹿神

遼俗好射麋鹿每出獵必祭其神以祈多獲

林牙

掌文翰官時稱為學士其郡牧所設止管簿

書

瑟瑟禮

祈雨射柳之儀遙輦蘇可汗制

再生禮

國俗每十二年一次行始生之禮名曰再生
惟帝與太后太子及夷離董得行之又名覆

誕

神速姑

宗室人名能知蛇語

蒲割顛

下乃頂切

公主名也

三尅

統軍官猶云三帥也

詳穩

諸官府監治長官

梯里已

諸部下官也後陞司徒

達刺干

縣官也後陞副使

麻都不

縣官之佐也後陞為命

馬步

未詳何官以達刺干陞為之

牙署

官名疑即牙書石列官也

世燭

遙輦帳侍中之官

敞史

官府之佐吏也

思奴古

官與敞史相近

徒覩古

邊徼外小國

世宗穆宗紀

蹕村上音帶

地名即松林故地

闌撒狻

抹里司官亦掌宮衛之禁者

撻馬

扈從之官

濃兀

部分名

葉格戲

宋錢僖公家有葉子揭格之戲

景宗聖宗紀

飛龍使

掌馬官亦爲導騎

橫帳

德祖族屬號三父房稱橫帳宗室之尤貴者

著帳

凡世官之家洎諸色人因事籍沒者爲著帳
戶官有著帳郎君

杓窠印

杓窠鷲鳥總稱以爲印紐取疾速之義凡調
發軍馬則用之與金魚符銀牌略同

國舅帳尅

官制有大國舅帳此則本帳下掌兵之官

拜與禮

凡納后卽族中選尊者一人當與而坐以主
其禮爲之與始送后者拜而致敬故云拜與
禮

拜山禮

祀木葉山之儀

敝穩

諸帳下官亦作常衮蓋字音相近也

萬役陷河冶

地名本漢土垠縣有銀礦太祖募民立寨以專採煉故名陷河冶

合蘇袞

女直別部名又作曷蘇館

執手禮

將帥有克敵功上親執手慰勞若將在軍則遣人代行執手禮優遇之意

阿札割只

官名位在樞密使下蓋墩官也

四捷軍

遼以宋降者分立二部一曰四捷軍一曰歸

聖軍

山金司

以陰山產金置冶採煉故以名司後改統軍司

興宗紀

別輦斗

地名

虎馱

下北
潘切

娑離八部人名

解洗禮

解裝前祓飲至之義

獨盧金

地名六院官屬秋冬居之

行十二神燹禮

神燹解見前凡大祭祀大朝會以十二燹列

諸御前

南撒葛栢

地名

合只忽里

地名

拖古烈

地名

曷里狺

地名

道宗紀

塔里捨

地名

撒里乃

地名

三班院祇候

左右班并寄班爲三班祇候官名

高墩

遼排班圖有高墩矮墩方墩之列自大丞相至阿札割只皆墩官也

天祚紀

侯里古

地名

頭魚宴

上歲時釣魚得頭魚輒置酒張宴與頭鵝宴

同

訛莎烈

地名

漚里謹

地名

權撻新查刺

地名

射糧軍

射請也

女古底

地名

落昆髓

地名

阿里軫斗

地名

忽兒珊

西域大將軍名

起兒漫

地名

虎思幹魯朶

通雅卷一百六

言解

北

志

禮樂志

祭東

國俗凡祭皆東向故曰祭東

敵烈麻都

掌禮官

旗鼓拽刺

葛兒罕

思亦作斯有力稱幹魯朶官帳名

漠北君王稱

萬曆三十四年刊

卷一百六

言解

搜刺官名軍制有搜刺司此則掌旗鼓者也
藝節

歲時雜禮名

九奚首

奚首營帳名

良穀之次

大行殯出羣臣以殺羊祭於路名曰食穀之

次

禩祭

上於琰切

凡出征以牝牡鹿各一祭之曰禩詛敵也

勘箭

車駕遠歸閤門使持雄箭勘箭官持雌箭比
較相合而後入宮

檐牀

一人肩任曰檐兩人以手共昇曰牀

攢隊

士卒攢簇各爲隊伍

方裯采殿

凡御宴官卑地坐殿中方墩之上其不應升
殿則賜坐左右采殿

地拍

田鼠名正旦日上於牕間擲米團得隻數爲不利則燒地拍鼠以禳之

迺捏呀呢

正月朔旦也

呷里討

呷讀作呷討讀作頗二月一日也六月十八日宴國舅族亦曰呷里討

陶里樺

上巳日射兔之節名

討賽呀呢

重午日也

賽伊呢奢

日辰之好也

捏褐耐

大首也

必里遲離

重九日也

戴粹

燒甲也

炒伍備尉

戰名也

卓帳

卓立也帳氈廬也

百官志

石烈辛袞

石烈官之長

令穩

官名

彌里馬特本

官名後陞辛袞

麻普

卽麻都不縣官之副也初名達刺于

知聖旨頭子事

掌誥命奏事官

提轄司

諸宮典兵官

皮室

軍制有南北左右皮室及黃皮室皆掌精兵

廳房

卽工部

梅里

貴戚官名述律皇后族有慎思梅里婆姑梅里未詳何職

抹鶻

瓦里司之官

先離撻覽

奚渤海等國官名疑卽撻林字訛

營衛志

象吻

黃帝治宮室陶蚩尤象置棟上名曰蚩吻

瓦里

官府名宮帳部皆設之凡宮室外戚大臣犯罪者家屬没入於此

抹里

官府名閫撒狻亦抹里官之一

算幹魯朶

算腹心搃刺也幹魯朶宮也已下國阿輦至監毋皆幹魯朶名其注語則始置之義也

國阿輦

收國也

奪里本

討平也

耶魯盃

興旺也

蒲速盃

義與耶魯盃同

女古

金也

孤穩

玉也

窩篤盃

慈息也

阿斯

實大也

何魯盃

輔佑也

得失得本

孝也

監母

遺留也

地理屬

屬珊

應天皇后從太祖征討所俘人戶有缺
之帳下名屬珊蓋比珊瑚之寶

永州

其地居潢河土河二水之間故名永州蓋以
字從一從水也

鄭頡

上慕各切
下胡結切

渤海郡府名

且慮

皆平聲

興中府縣名

奚養

上音奚

幽州澤藪名見周職方

菑時

幽州浸名出同上

墮瑰

門名遼有墮瑰部

野旅寅

野謂星野旅謂躔次寅者辰舍東北之位燕

儀衛志
分析津之所也

金炭下祖
叢切

馬首飾也

果下馬

馬名謂果樹下可乘行者言其小也

實里薛袞

祭服之冠行拜山禮則服之

鞞鞞帶上他協切
下徒協切

武官束帶也

扞腰

卽拄腰以鵝項鴨頭爲之

胡木鑿

胄名

鞞馬上音
誕

馬不施鞍轡曰鞞

白毳音餌

以白鷺羽爲網又罽也

兵衛志

捉馬

拘刷馬也

欄子軍

居先鋒前二十餘里偵候敵人動靜

弓子鋪

遼軍馬頭舍不設營塹折木稍爲弓以爲團集之所又諸國使來道旁簽置木稍弓以充

欄楯

食貨志

云爲所

義卽營運字之訛

刑法志

鍾院

有冤者擊鍾以達于上猶怨鼓云

楚古

官名掌北面詔囚者

皇子表

五石烈

卽五院非是分院爲五以五石烈爲一院也

六瓜

瓜百數也遼有六百家奚後爲院義與五院

裂麕皮

同二院即迭刺部折之爲二者是也

世表

莫弗紇

諸部會長稱又云莫弗賀

蠕蠕而宣切

國名

俟斤

突厥官名

遊幸表

醢醢鹿

鹿性嗜醢灑醢於地以誘鹿射之

女壤

虞人名

列傳

可敦

突厥皇后之稱

忒里蹇

遼皇后之稱

耨幹麼

麼亦作改耨幹后土稱麼母稱

乙室板里

國舅帳二族一名

諸功臣傳

龍錫金佩

太祖從兄鐸骨札以本帳下蛇鳴命知蛇語

者神速姑解之知蛇謂穴傍疑有缺

得金以爲帶名龍錫金

撒刺

酒樽名

遙輦糺

遙輦帳下軍也其書永興宮分糺十二行糺

黃皮室糺者倣此

吐里

官名與奚六部秃里同吐秃字訛

寢殿小底

官名遼制多小底官餘不注

雜丁黃

禮男幼爲黃四歲爲小十六爲中二十一爲

丁軍中雜幼弱以疑敵也

遙輦尅

遙輦帳下掌兵官

抵桓

宮衛門外行馬也

楯柶犀

千歲蛇角又為篤納犀

珠二琲下蒲昧切

珠五百枚為琲

題里司徒

題里官府名

崖中上陟栗切

地名

堂印

博之采名

臨庫

以帛為通曆具一庫之物盡數籍之曰臨庫

堂帖

遼制宰相凡除拜行頭子堂帖權差俟再取二日出給告勅故官有知頭子事見陰山雜

錄

夷离董畫者

畫者人名爲夷离董官

虎斯

有力稱紀言虎思義同

遼史卷一百十六終

